



Yesu, Kielelezo Chetu

Yeeye asiyejua dhambi alimfanya kuwa dhambi kwa ajili yetu, ili sisi tupate kuwa haki ya Mungu katika Yeye. —2 Wakorintho 5:21.

Katika kujisalimisha kwa Kristo kwenye kaida ya ubatizo, Anaonesha kwa mwenye dhambi moja ya hatua muhimu katika uongofu wa kweli. Kristo hakuwa na dhambi zozote za kuoshwa, lakini kwa kukubali kuwa mbadala wa mwanadamu, dhambi za mwanadamu mwenye hatia ziliwekwa juu Yake.... Wakati Mungu anamkubali Kristo kama mbadala wa mwenye dhambi, Anampa mwenye dhambi nafasi, kwa msaada wa nguvu za kiungu za Kristo, kuvumilia jaribio ambalo Adamu alishindwa.

Kristo alikuja kwa Yohana, akitubu kwa niaba ya mwenye dhambi, akiamini kwa niaba ya mwenye dhambi; kwamba kupitia mpango Aliouweka wa kuchukua ubinadamu, na kuteseka na kufa kwa ajili ya mwanadamu, mwenye dhambi, kupitia toba, imani, na ubatizo, atakubaliwa na Mungu. Alizikwa na Yohana katika kaburi la maji, na akatoka nje ya maji ili kumwakilisha mwanadamu, katika maisha Yake matakatifu, mfano wa kweli wa kuiga.

Hatua za uongofu, zilizowekwa wazi, ni toba, imani kwa Kristo kama Mkombozi wa dunia, imani katika kifo, kuzikwa, na kufufuka Kwake, inayooneshwa kwa ubatizo, na kupaa Kwake juu ili kuomba kwa niaba ya mwenye dhambi. Mwanzoni mwa huduma Yake kwa umma, Anajitambulisha katika tabia Anayoidumisha kwa mwanadamu katika kazi Yake ya upatanisho. Anajiweka Mwenyewe mahali pa wenye dhambi kama mbadala wao, akichukua dhambi zao, akijihesabu pamoja na wakosaji, na kufanya kazi ambayo mwenye dhambi anatakiwa kufanya katika toba, imani na utii wa hiari. Ni kielelezo kizuri kiasi gani ambacho kimetolewa hapa katika maisha ya Kristo kwa ajili ya wenye dhambi kuiga! Ikiwa hawatafuata mfano waliopewa, hawatakuwa na udhuru.

Wapendwa watoto na vijana, Baba yenu wa mbinguni na Mwokozi mpendwa ndio marafiki zenu bora kabisa. Mna kila ushahidi unaoweza kupatikana kwa ajili yenu wa upendo wao kwenu. “Yeye asiyemwachilia Mwana wake mwenyewe, bali alimtoa kwa ajili yetu sisi sote, atakosaje kutukirimia na mambo yote pamoja naye?”

Mungu hatatunyima chochote kitakachokuwa kwa manufaa yetu. Yesu angependa tuwe na furaha katika dunia hii, na tufurahie pamoja Naye utukufu wa dunia inayokuja. Mungu amewapa watoto na vijana mwaliko wa kujisalimisha Kwake. “Mwanangu, nipe moyo wako.” Ahadi imepewa—“Na wale wanitafutao (tafsiri nyingine – ‘mapema’) kwa bidii wataniona”....

Wote wanaoishi wanazo dhambi za kuoshwa.... Toba ya kweli ya dhambi, imani katika stahili za Yesu Kristo, na ubatizo katika kifo Chake, ili kuinuliwa kutoka kwenye maji kwa ajili ya kuishi maisha mapya, ni hatua za kwanza katika kuzaliwa upya ambako Kristo alimwambia Nikodemo lazima apitie ili aokolewe. Maneno ya Kristo kwa Nikodemo hayakuwa kwake tu, bali kwa kila mwanamume, mwanamke, na mtoto atakayeishi duniani.... Tuko salama kwa kufuata mfano wa Kristo (Youth’s Instructor, Februari 1, 1874).